

虬髯客傳
崑崙奴傳
餘生錄

紅線傳
虎口餘生記



虎口餘生記

邊大綬撰

中華書局

序

凡人生窮通得失莫不有一定之數之理。而況生死之際乎。達者灼見其然。故見利而不動。見害而不恤。忠孝節義之事。往往置生死於度外。而卒能出險就夷。常有出於意想所不及。亦若有天默相之者。秦之暴也。若蜂蠆之毒。子房爲韓報仇。擊始皇博浪沙中。大索天下。十日不得。是豈子房有奇謀異計。能匿跡天下之外哉。天鑒其爲韓之忠。卽在始皇副車之側而不覺也。明垂三百年不用兵革。圖賊一亡命。乘間竊發。據關隴上游之勢。不踰年而中州陸沈。乘輿淪陷。幾一天下。此與暴秦何異。誰敢掠其鬚而扼其吻。予以典關入晉。長白邊年翁出餘生錄見示。其宰米脂也。掘賊祖墓。付之灰燼。一片報國之誠。真有發於至性而不暇計及利害者。使王氣盡洩。闔卽授首。豈不千古快事。奈何天未厭亂。猶然橫行長驅。迨至跟跲西走。一敗不支。洩氣之說驗矣。獨束身坐待入彼牢籠。與子房之案而不得。勢更迫。禍彌深。雖然。賊自爲難以來。屠戮不知億萬計。而必不能以忠孝自許者。舒其夙憤。天也。然則。始皇望金陵。有王氣。發人夫鑿斷其脈。未爲無見。而卒以亡。豈非行暴者不能久存。而忠孝者冥冥必佑。理固然哉。甲午初冬。年家弟黃自起書于晉陽公署。

癸未。余在京師。縉紳先生爭談有米脂令者。掘闖賊祖父之墓。聚其骨而灰之。時心奇其事。不知爲何許人也。甲午。有晉關之役。見太原守邊長白先生所刻餘生錄。蓋卽令米脂者也。其說曰。賊祖海。父守忠。葬

於本縣之三峯。崇山勢環抱。林木鬱葱。若佳城者。訊之故老。云穴中舊有黑碗一枚。塚窮碗見。骨黑如墨。額生白毛六七寸許。又下一塚。生榆一株。粗如臂。龍蔭不可犯。衆斧之。榆斷墓開。骨節綠如銅青。亦生黃毛數寸。又有白蛇。長一尺二寸。頭角嶄然。盤旋若不勝狀。其蛇與碗俱存。噫。先生之智奇之功大矣。夫賊以亡命。罪至通天。糜我疆土。逼我君后。謁四方之師。武臣力不能一矢相遺。海水羣飛。白日晝晦。從風流毒。有不忍言。先生獨能出奇計。殲產逆之鬼。制死賊之命。壬癸天下。唯長白一人而已。甲申五月初一日。于滄州予舉義發喪。獲偽印十八顆。斬賊臣頭。放祭先君后之靈。誓不與賊俱生。終以未食闔肉爲憾。向使卽不生於楚。而生於米脂。不爲官而爲米脂之民。荷鋤瞻君馬首。鞭海之屍而飲守忠之頭。不猶愈于爲人臣而罔知報讐雪恥者乎。向使長白重身家計利害。或知而不爲。爲之未必有濟。將若之何。雖然。皆天也。非人也。闔不生。天下不亂。闔不死。天下不平。長白不令米脂。闔脈不絕。鬼神不助長白。國仇不復。然則洩先明十四帝之憤。開我朝億萬年之運者。亦唯長白一人而已。天下之知長白功者。或寡矣。于是序其事。以告爲曲突徙薪之謀者。青溪弟程正揆拜識。

嘗閱史至文文山起兵勤王。爲敵所獲。不覺愴然曰。危乎哉。危乎哉。厥後海外逃歸。流離困苦。艱辛萬狀。迄今讀其惶恐零丁。恨極千古等語。猶令人潸然淚下也。萬死一生。莫不以爲亘古以來未之前聞。及聞我父母餘生爲其險危更倍之。何異世而同符也。讀至出關欲稟搖手處。呼吸存亡。人人爲我父母危。然以爲不必危也。更無庸危也。何也。甯邑素稱疲瘠。自壬申變。屠戮幾盡。後更加之以奇災異荒。重之以兵。

火焚劫。逃者逃。死者死。白骨枕籍。村落皆墟。其餘未逃未死者。膏髓已枯。皮骨僅存。氣息奄然。難保旦夕。是不啻入虎口。且已幾嚙之矣。我父母下車。剔弊振蠹。興衰疏滯。以可手之經綸。沛心上之雨露。凡所以休養百姓者。無所不至。故幾月來。殘喘之餘。漸有起色。是甯民今日得以稍甦旦夕者。皆我父母一人之生有以生之也。天留一人之生。以生一邑。且將以生一邑者。生天下。當日雖入虎口。又何必爲之危也。況我父母非百里才。胸藏數萬甲兵。行見削平禍亂。勘定底績。盡一世而奠安之。盡蒼生而霖雨之。然更於文文山外。取堂阜脫囚事上獻之。以爲我父母頌。皆順治乙酉歲三月上旬。治生路坦然。謹頓首拜撰。

塘報稿

陝西延安府米脂縣爲塘報事。職自正月初二日奉制臺密扎。隨喚貢士艾詔。面諭機宜。尋訪李成去訖。至初八日。艾詔回縣。云自榆林尋得李成來見。職隨喚進後堂詢問。稱言伊係闖賊里人。曾爲賊祖葬墳。因識其墓所。賊祖李海。父守忠。係本縣雙泉都二甲人。闖賊名李自成。幼曾爲僧。俗名黃來僧。爲姬氏牧羊奴。自崇禎三年。西川賊不沾泥作亂。流入賊營。不知下落。至崇禎九年。賊領人馬千餘來縣城外。自通姓名。回家祭祖。號稱闖將。人始知其姓氏。今年月已深。不記其祖葬處。當日葬時。開土是三空穴。內有黑碗一箇。因填其二穴。用一穴安葬。仍以黑碗點燈置墓內。今但伐有黑碗者。卽賊祖也。職隨喚練總黑光正。堡長官王道正。率領箭手三十名。鄉夫六十名。卽刻起身入山。一晝夜行二百里。始到其地名三峯子住宿。是爲初九日。夜下大雪。深二尺餘。山路陡滑。馬不能進。職下馬步行。五六里至其山。鳥道崎嶇。久絕人踪。旋開道攀緣而上。又一里許。見窰舍十餘處。牆垣尙存。卽闖賊庄村。再過一山。則其墓也。四面山勢環抱。氣槩雄奇。林木叢雜。不下千餘。大小墓二十三座。伐五六塚。其骨皆血色油潤。不似遠年枯朽。然皆無黑碗踪跡。天晚難以下山。遂坐賊舊窰中。向火至天明。再掀數塚。而黑碗見。卽李海也。其骨黑如墨。頭額生白毛六七寸許。其左側稍下一塚。是李守忠墓。頂上長榆樹一株。其粗如臂。根枝四圍籠罩。用斧砍斷。其墓始開。中間盤白蛇一條。長一尺二寸。頭角嶄然。揚起三寸高。向日張口。復盤臥。隨取裝入黑光正

順帶中伐其骨骼。凡骨節開皆綠如銅青。生黃毛五六寸許。其餘骨骼有毛者七八塚。盡數伐擷。聚火燒化。大小林木千餘株。悉行砍伐。斷其山脈。賊墓已破。王氣已洩。賊勢自敗。其黑碗白蛇呈驗軍門訖。理合塘報。崇禎十五年正月十四日塘報。

陝西總督軍門汪喬年手札。

讀來論足見門下報國熱腸。第須體訪的確。莫使波及無辜。庶天理順而人功亦易成也。他日滅賊。當以門下之功爲首。此復。

汪制臺再札。

來札知闕墓已伐。可以制賊死命。他日成功。定首鉞以酬草履。

虎口餘生記

明 邊大綬撰

余自壬午春伐賊墓。米人洵洵。謂必招禍不測。余諭之曰。如賊果脩怨。余一身當之。定不爾累。衆皆疑信不一。而艾朝棟、高映元、馮起龍等。實爲賊之姻黨。聞賊行。牌至西安。有四月十九日起馬入秦之語。遂羣謀俟賊到時。執余暨艾詔、黑光正等獻賊。逆謀嘖嘖有據。余欲申聞撫臺。而其巡捕常昌運與高映元內親。恐其攬援中阻。遂密稟張按臺。不意黨人在勢要門牆。蚤爲先容。竟致沈開。值新按臺至。爲余同鄉金公逆黨。陰不自安。共謀去余。會部咨甄別賢否。撫臺列余薦剡。按臺又欲會題陞城堡廳。黨人益惴惴懼。值十六年大計。伊探訪余官評稱最。其恨愈深。遂捏造單款。極力傾陷。然終以司冊無過。未能大害。止蒙降處。報到之日。米人老幼泣嗟。痛余之去。而余舉家慰快。謂得脫苦海。且遠仇讐也。撫按皆諱留。候題照舊管事。余力辭。解任出疆之日。不能爲行李。時長兄順爲山西澤州守。因赴澤。是爲歲之七月初旬。至十月六日。而閩賊破潼關。旋開陷西安。州縣皆望風投獻。晉中震驚。余十一月自澤歸里。然指邇歲。賊鋒已逼晉。而東會真定叛卒殺撫臺。迎賊固關失守。三路犯神京。遠邇震恐。父兄親戚咸爲余憂。勸遁跡以避。余憮然曰。一身可隱。其如八口何。卽妻孥可捐。孀母何賴。萬一蒙難。吾何以見先人于地下也。況同堂手足。一公族衆。寧忍全一己之生。貽多人之害乎。吾原爲朝廷滅賊計。今日爲社稷死。有餘榮矣。何以避爲。

遂違衆意。三月廿一日。驚傳都城已破。萬乘殉國。余聞之。北向慟哭。再拜成服。杜門謝客。以聽天命。越四月廿八日。聞人言嘖嘖。道賊犯山海。敗潰西走。余聚親契諸生謝銘石等密謀。欲興義師。邀賊以雪國忿。擬次月朔舉義旗。而次日賊之緹騎到矣。先數騎進城。持令箭。詭言覓公館。實以覘余之居處也。余窺知有變。立街頭待之。頃有衙役二人。傳僞令曹懷玉稟執余。余挺身往見。即付賊使白姓吳姓者云。萬歲取你做官。無恐也。余隨之行。入堂弟大任宅。老幼驚避。賊坐索飲食。無應者。不勝怒。肆行砍毀搜掠。執一僕爲之供應。僞官又遣人來供奉。竝絆余不使離寸步。內外不通一信。傍午。余長兄來視。余始知母妻家口盡下獄。一門兄弟俱被執。則澤守兄暨堂弟廩生大顯。大任。大顯姪銘琯。銘琦。從弟諸生大防。大中。大謨。大訓。叔知縣維隆。維明。族叔諸生有道。武舉有謨。寄倉。閭邑父老討保。長兄始得來一面。余聞之。五內如割。相對不交一言。即與兄永訣矣。謝生銘石來探余。耳語曰。聞賊已敗。大兵且至。兄放心行。毋爲賊屈。我將謀有以脫兄者。余頷之。初一日。執余西行。衆爲備一塞衛。僮僕散逃。覓一市徒相隨。邑人觀者塞巷。皆爲噓唏。余忻然就道。是日至肅寧。二日至安平。三日至無極。此日大雨。賊衆悉披雨具。余露身淋漓。行三十餘里。次日至真定。入城。喧傳萬歲駕將至。賊黨衣紅者滿街。謂老府兵。見余咸擲槍曰。是伐墓人耶。帶余見僞帥馬。入其二門。一賊衣藍紗者云。是旗鼓。詢伐墳始末。入後堂。稟僞帥訖。傳言且出。遂同吳旗牌至其家宿。至次日初五日。甫出。即有賊來。傳馬老爺上南門發兵。候駕至便起行。吳姓者遂帶余往見。至街頭。則云老爺上西門矣。復至西城上。吳姓者先到。指余曰。出城。見賊兵自北而南。塵土蔽天。然皆老幼

參差狼狽伶仃。十賊中夾帶婦女三四輩。全無紀律。余見之不勝忿懣。如此鼠輩。而所向無堅城。致萬乘屈沈。真可痛哭流涕也。恨余被執。不能殺賊。見其滅亡耳。立數刻。吳姓復同一任姓者押余入城。至督府前。候一二時。僞帥不返。倏傳曰。萬歲至矣。不進城。在關帝廟喫中火。卽行。二賊又帶余出城。至廟外。此時隨余縣役四人。止存一王姓者。餘皆跟驢人俱亡矣。余自分見闖賊決無生理。盡以後事囑王役。託其傳語家人。我死于國難。無恨也。須臾聞掌號。賊衆起身去。僞帥傳諭。帶余西行。是日至獲鹿之上安。次日出固關。值闖賊方殺人。死者委積。云關下百姓以塞井故。又將賊卒之不帶弓箭者。盡砍斷左手。血肉淋漓。慘不可言。是時押余者三人。任姓者夜逃。偕縣役王姓遁去。遺下一馬。余乘之。同吳陳二賊出關。見闖賊下馬。陳賊欲棄。知吳賊搖手而過。使是時一言。余粉齧矣。初七日。過平定州。賊中傳言大兵追至核桃園。已抵關下。調後營人馬回防關。二賊復押余回住平定東關外。候示下。至初十日傍晚。始傳止調精兵。其貨重先行。此時闖賊已先上太原。吳賊同一賊僮押余。馬步共八九十。夜行一宿。天明至壽陽南關。搜米覓水炊飯。食訖喂馬。未飽。余伺而臥。吳賊出。少時其賊僮來催余曰。起。起。牽馬行。至南街路西一小門。呼余入。則吳賊在其內。命余拴馬卸行李。伊入室仰臥酣睡。其僮亦上樓臥。余亦假寐。許久不醒。聞馬臥余呵之不起。出鞭之。凡再三。賊堅臥弗覺。余遂出門北行。迎一賊衣黃者。問汝尋得水否。余詭曰。南頭無水。余復北尋耳。疾趨至舊店。入門。見三賊方束裝。謂余曰。汝已行。何復返。余應曰。來取水具耳。進其後房。院有一角門。外卽壽陽城下。河中無水。余跳下。循城北行。復上東岸。踰牆入空房內。四顧不可蔽。復踰垣。

出北走。遇二鄉民持挺。蓋搶督者。詢余何來。余詭云亦搜物者。舍之而南。余北走。不百步許。聞後面喊聲。意追者至。停步伺之。則四五僮父。各執鎗棒圍余曰。汝從賊來耶。余應曰。我逃難耳。索財物。余曰。赤身。財于何藏。盡上下衣與之。換破衣二件。僅蔽體。遂東北行。時日方午。慮爲賊所跡。潛身山畔土窖中。比至晚。賊騎來者六七次。皆未獲見。月出甚高。余始敢出穴。不辯東西。視月所向。攀緣上下。經墟墓澗澤中。燐火瑩焰。殊非人境。至曉。逢行路者。問所向。余曰。逃難回鄉。問爲何許人。余詭曰。保定諸生。爲賊所掠。其人憐之。指從此東北有方山寺。可以棲身。余謝之行。凡三十餘里。遂投僧寮。住六日。始東行。僧衆各贈余錢數十作路費。由山僻小徑詢路而行。飢則旬食。晚宿山廟。凡經由土寇之叢數處。余已作乞弓形。無阻撓者。但聞固關娘子關。俱賊兵把守。不敢過。遇荷簣者三人。識小路。隨之入流黃口。萬山險絕。猿獠所經。林木翳天。日遇陡絕處。頂踵相磨。上天入淵。凡數十折。始反陸。渡井陘。大河六七道。涉淖沱。念余西過時。自分不返。茲復生還。不勝感憤。逾真定。與余同行者二人。分路向新樂。余循舊路而東。至肅寧。折而北。至西柳村。問路。鄉人詢姓氏。知族弟壘在其外。父王宅。傳語來見。相對淒其。留余宿。更余旬服。黎明。聞炮聲震天。乃土賊爲亂。閭鄉戒嚴。傍午始息。借余一塞僕。送至王家莊胡宅。爲妹丈太學生永清。其尊人舊河南太守。龍江公暨其長公劍原在門。見余來。驚喜交集。相持唏噓。入見二妹。不勝慟悼。次日遣人報信至縣。老母耑三僕來接。傍晚到縣。途逢猛雨。冒行抵舍。親戚族衆慰勞者塞戶。謁老母。悲慟欲絕。真再生。相見猶疑夢寐也。是爲五月廿九日。計被執時正滿一月。憶余先曾祈關聖籤。有直須重見一陽後。始可求神望。

佛持之語。余至眞定爲五月五日。聞賊至。自分必死。幸賊勢迫促。未見至壽陽而逃。則重見一陽之說也。先一日宿山中。朦朧之際。耳中聞先大人聲曰。兒苦中又苦。我傷而又傷。爾第見佛聖現化卽生矣。隨見有間光。大如初出日。金光爛熳。內有佛菩薩騎獅象而過。皆有鬚髯。不類素常所見像。須臾光散。其清如鏡。正照余身而覺。天明至壽陽。遂獲脫難。順治元年仲秋既望。再來人邊大綬識於長安僧舍。